



UNIVERSITÄTS-
BIBLIOTHEK
PADERBORN

Universitätsbibliothek Paderborn

Ant. Augustini Archiep. Tarracon. De Emendatione Gratiani Libri Duo

Agustín, Antonio

Dvisbvirgi ad Rhenvm ; Arnhemii, 1676

Praefatio Editionis Parisiensis.

urn:nbn:de:hbz:466:1-10603



P R Æ F A T I O

EDITIONIS PARISIENSIS.

CUM Maximi Pontifices hac nostra
Ætate de Gratiani emendatione tan-
tum laborarint, ut illius erratis corri-
gendis non quoscumque viros, sed erudi-
tione, atque auctoritate valde præstan-
tes præficiendos esse judicarint; selectis
aliis, quorum opera adjuti, quod erat in
animo, perficerent: sane dubium esse ne-
mini potest, rem magni esse momenti,
Christianæque reipub. universæ pluri-
mum interesse. Ac quidem vero, quam-
vis tot summorum hominum, & ecclesiæ
Principum auctoritas, etiam sine alia
caussa, multum apud omnes valere de-
beat; tamen si res diligenter considere-
tur, licet eadem indigeremus, ratione i-
tem constat, majus hoc quiddam esse,
quàm vulgo homines opinantur, qui to-
tum hoc studiorum genus pro nihilo ha-
bentes,

* 2

bentes,

PRÆFATIO.

bentes, jurisque contextum contemnen-
tes, se totos ad interpretes conferunt.
Quibus ego, ut eos magni faciant, &
tamquam duces, ac magistros habeant,
cum concessero; illud tamen constanter
affirmabo, juris Pontificij tantam esse di-
gnitatem, ut non solum ipsarum rerum,
sed & verborum, immo & litterarum, ac
interpunctionum sit maxima ratio omni-
no habenda. Si enim homines splendidi
cum aedificia exstruenda suscipiunt, non
necessitatem, aut utilitatem solum, sed
pulchritudinem potius ante oculos sibi
proponunt; neque tantum atria, porticus,
& conclavia, sed etiam partes singulas,
ut columnas, lapides, eorumque coagmen-
tationem, & res alias minutas conside-
rant; dantque operam, ut singula omnia
lepore quodam ita inter se consentiant,
ut nusquam nisi venustam, & apte con-
nexum quidquam reperiatur: multo ma-
gis in juris Pontificij contextu, quo non
voluptas parva, aut aliqua commoditas
exigua queritur, sed ipsa respub. Chri-
stiana regitur, moresque hominum con-
forman-

P R Æ F A T I O.

formantur, ac effrenatæ cupiditates coercentur, illud curandum est, ut partes omnes aptæ, & integræ sint, nullumque verbum suspiciosum appareat. Quamobrem cum Gratiani collectio, qua magna pars juris Pontificij veteris continetur, mendosior causa, quibus temporum illorum vitio abundat, multorum sibilis exploderetur; summa rei amplitudo jure suo postulare videbatur, ut Maximi Pontifices de illius emendatione cogitarent, & viris exquisitis ingeniis, omnibusque naturæ, & doctrinæ præsiidiis instructis totum negotium committerent. Cumque extra Urbem non deessent, qui hanc provinciam possent juvare, quod in hoc studiorum genere satis versati invenirentur: unus tantum, quod sciam, vir pro dignitate numquam satis laudatus, totius Christianæ reip. lumen clarissimum, deque ea optime meritus Ant. Augustinus Archiepiscopus Tarraconensis, qui superiori anno nobis ereptus fuit, hunc auctorem suscepit scriptis suis illustrandum. Quid effecerit, ex his duobus libris dialogorum

P R Æ F A T I O.

rum more contextis, quos ante Romanam editionem conscripsit, & ea perlecta censuit edendos, licet judicari. Est namque Gratiani contextus ager quidam incultus, tot herbis asperis, & agrestibus vestitus; ut licet viri selecti tamquam diligentes agricolæ multam culturam adhibuerint, & aratro illum sæpe perstrinxerint: aliquot tamen, si non herbæ, fortasse radicum fibræ, quæ radicitus evelli non potuerunt, adhuc restare videantur. Quare dabunt ipsi veniam, si fructus laborum tanti viri, cujus memoria recens in benedictione est, eritque in perpetuum, communi utilitati percipiendos proponimus; in quibus omnia fere Gratiani erratorum genera notantur, multa emendatione illustrantur, ac denique totus ita examinatur, ut non solum rerum ipsarum, verum etiam verborum pondera expendantur.

JUDI-